

SARS E NTJHAFATSA DITSEBAHATSO TSA BOLAODI BA MEEDI TSA HO TSHELWA HA MADIBOHO BAKENG SA DIPALANGWANG TSA MATJHABENG HO TLOHA KA LA 1 PHUPTJANE 2026

Tshwane, 19 Motsheanong 2026- Ditshebeletso tsa Lekgetho tsa Afrika Borwa (SARS) ho tloha ka la 1 Phuptjane 2026, di tla hloka hore dipalangwang tsohle tse ngodisitsweng matjhabeng di tsebahatswe Mokgwatshebetsong wa SARS wa Botsamaisi ba Baeti (TMS) pele di ka kena kapa hona ho tswa ka Afrika Borwa.

Khomeshenara ya SARS Ngaka Johnstone Makhubu o boletse hore mohato ona o ikamahanya le ditlwaelo tse sebediswang ke Bolaodi Ba meedi matjhabeng mme sena ke karolo ya lenaneo le tswelang la SARS la ho ntjhafatsa ditshebetso tsa bolaodi ba meedi makenong a naha, ho ntlafatsa boikobelo le ho sireletsa botshepehi ba makeno a naha. O tswetse pele ka ho bolela hore sena se tla ka melemo e hlakileng e akaretsang “kgonahalo e ntlafatseng ya ho thibelwa ha tse ka bakang kotsi, ntlafatso ya tshebedisano le bolaodi ba dinaha tse ding le ho ntlafatsa tsela eo baeti ba sebeletswang ka yona ka kakaretso. Sena se boela se tshehetsa boitlamo ba ponaletso ya tsa ditjhelete ya Afrika Borwa le ho ntlafatsa tshireletseho ya naha ka ho nnetefatsa hore dithoto, tjhelete le dipalangwang di tsebahatswa ka nepo le ho hlahlojwa pele di kena kapa pele di tswa.”

Moo dipalangwang tsa matjhaba di tliswang ka hare ho naha nakwana, ho ka nna ha ntshuwa diphemiti tsa nakwana tsa nako ya dikgwedi tse tshelela, mme diphemiti tse jwalo di ka sebedisetswa ho kena le ho tswa ka naha makgetlokgetlo ka nako eo ntle le tlhokeho ya ho etsa kopo ya ho kena kgafetsa. Boeti ba ho kena le ho tswa ka meedi kgafetsa kgafetsa bakeng sa mosebetsi, thuto, kgwebo, tlhokomelo ya bongaka kapa mabaka a mang a molaong ha a ame tshebetso ya phemiti, ha feela e le hore e ntse e sebetsa le hore ya ntjhafatswa pele e fellwa ke nako. Motjha ona o etseditse ho nolofatsa boikobelo ha ka lehlakoreng le leng o ntse o ntlafatsa bodisa, tsepamo le ho hloka leeme madibohong. Lesedi le mabapi le ditlhoko tsa thomelohare ya nakwana tsa Bolaodi ba Meedi di fumaneha mona <https://www.sars.gov.za/customs-and-excise/>.

Le ha SARS e lebelletse hore baeti ba tla tsebahatsa dipalangwang tsa bona tse ngodisitsweng matjhabeng Mokgwatshebetsong wa SARS wa Botsamaisi ba Baeti (TMS) pele di fihla madibohong ka sepheo sa ho sebedisa monyetla ona o nolofaditsweng le o potlakang, Ngaka Makhubu o tobokeditse hore SARS e tla tswela pele ho tshehetsa baeti ba sa kgoneng ho tlatsa tsebahatso ena onlaeneng ka hore ho be le bahlanka ba shebaneng le sena ka ho kgetheha madibohong a naha ho thusa ho tataisa baeti bana ka motjha ona. O tswetse pele ho hlokomela hore le ha ditsebahatso tsa onlaene di ntlafatsa dinako tsa tshebetso, tsona ha di nke sebaka sa taolo ka seqo e etsahalang madibohong, mme baeti ba ntse ba lebelletswe ho

iponahatsa ka seqo hore ho etswe dinnetefatso, tshebetso le dihlahlobo tsa Bolaodi ba Meedi (moo ho hlokehang).

Khomeshenara o tobokeditse hore “Boikobelo ha se boikgethelo; beng ba dipalangwang ba sa tsebahatseng dipalangwang tsa bona tsa matjhabeng kapa ba fanang ka lesedi le sa fellang ba tla ba le ditlamorao tsa ho phethahatswa ha molao le tshebetso e nkang nako e telele madibohong. Ke boela ke batla ho tiisa hore beng ba dipalangwang ba ikobelang ditlhoko tsohle tsa molao, motjha ona e tla ba o thellang feela, empa moo boikobelo bo fokolang teng, sena se tla baka ditiehisano nakong eo ho tshelwang madiboho”.

SARS e kgothaletsa beng ba dipalangwang tsa matjhabeng le ba ditshebetso tse tshelang madiboho ho sebedisa mehlodi ya semmuso ya SARS ho fumana tataiso e nepahetseng le ho utlwisisa metjha e metjha ya tsebahatso pele ho letsatsi la ho kgakolwa ha sena ka la 1 Phuptjane 2026.

Lesedi le fetang lena le fumaneha ho <https://www.sars.gov.za/travellerdeclaration/> le ho <https://www.sars.gov.za/customs-and-excise/>, kapa ho SARS MobiApp.

Dipotso tsa bophatlalatsi di ka lebiswa ho SARSMedia@sars.gov.za.